



STORD FOTBALL
1918 - 2025

ÅRSMELDING 2025



ÅRSMELDING FOR STORD FOTBALL 2025

INNLEIING

Stord Fotball er ein klubb i utvikling. Dei siste åra er det tatt grep rundt drifta for å kunne hente fart og bygge vidare. I 2025 har me fått på plass eit betre økonomisk utgangspunkt gjennom at Stord Kommune no har tatt sin del av kostnaden på 1,7 MNOK for garderobeanlegga som vart oppført i 2014. Me har reduksjon i lønnskostnader, samt ei oppbygging av spelarutviklingstiltak og Fotballfritidsordninga som gir eit handlingsrom i forhold til anleggsutvikling og sportsleg satsing i klubben framover.

Stord Fotball skal tilby rundt 550 spelarar eit trygt og godt miljø. Eit miljø som skal reflektera verdiane våre Meistring – Glede – Samhald.

I tillegg skal me tilby dei som vil mest med idretten ein arena der dei kan konkurrera på det høgaste nivået i vår region. Det har me i dag gjennom dame- og herrelaga våre i 3.divisjon, og det er det viktig å bygge vidare på. Den lysta og den svolten etter å utvikla seg sjølv, i lag med andre. Det ser me på som ein viktig samfunnsfunksjon som me vil utvikle vidare. Når me seier me skal ta vare på alle, så må me og ta vare på dei som legger mest i potten i form av tid, krefter og engasjement. Breidde og topp hand i hand.

Vidare opplever me at næringslivet heier på den aktiviteten me tilbyr. Det er heilt essensielt for å kunne drive klubben vidare og noko me set stor pris på. Spelarane våre treng ein klubb, eit samfunn og eit næringsliv som er med på laget.

Stord Fotball er ikkje som andre fotballklubbar lokalt. Me driv ei rekke spelarutviklingstiltak der me har tilsette for å utvikla og driva det. Me arrangerer ei rekke innandørsturneringar for fotballspelarar i alle aldrar, me har den største fotballturneringa i kommunen gjennom Puttefestivalen, og kvar periode det er skulefri har me fotballskular og fritidsodningar for dei minste.

Men mest av alt er me omlag 60 lag, 550 fotballspelarar og 160 frivillige i ulike verv, som ynskjer å skapa ein positiv arena for oss sjølve, borna våre og alle dei rundt oss. Det er ganske imponerende i seg sjølv, og det gir oss eit potensiale til å gjere ein stor og positiv forskjell i vår region.

Tusen takk til alle dykk som bidrar positivt!
Heia Stord Fotball!

Meistring – Glede - Samhald

ØKONOMI

Rekneskap 2025 og budsjett 2026

Rekneskapen for Stord Fotball pr. 31.12.2025 syner eit driftsresultat med eit underskot på kr -55.064,-. Ordinært resultat inklusiv finanspostar viser eit underskot på kr -55.619,-

Eigenkapitalen vart redusert frå kr 3.421.658,- pr. 31.12.2024 til kr 3.366.039,- pr. 31.12.2025.

Budsjett for 2025 var eit resultat på kr 100.000,- og med ei inntekt på kr 8.171.684,-. Rekneskapen viser ei samla inntekt i 2025 på kr 8.613.885,-.

Samla drifts-, vare- og kapitalkostnader var i 2024 kr 8.668.949,- Resultat for 2025 viser dermed eit resultat som er kr 155.619,- svakare enn budsjett. Dette hovudsaklig grunna ein auke i andre driftskostnader knytta til vidare utvikling av klubben.

Samla langsiktig gjeld pr. 31.12.2025 er kr 1.564.670,- der kr 604.670,- er lån til ny bil i DNB Finans, og kr 960.000,- er lån frå Kraftsalsfondet til Stord kommune. Totalt er langsiktig gjeld redusert med kr 822.153,- i 2025.

Lån i Kraftsalsfondet er i sin heilheit knytta til finansiering av garderobeanlegga på Vikahaugane og Langeland, og Klubbhus på Vikahaugane.

Avskrivingar knytt til garderobebygga, klubbhus, bil m.m utgjorde kr 239.600,- i 2025. Og resultat av finanspostar viser kr. - 556,-

Styret viser for øvrig til revidert rekneskap med noter.

Rekneskapen er i 2025 ført av ECIT Stord AS.

KPMG har revidert rekneskapen for Stord Fotball i 2025.

Styret legg fram eit budsjett for 2025 til årsmøte som viser et overskot på kr 100.000,- og ei inntekt på kr 9.000.000,-

ORGANISASJON OG TILSETTE

Stord Fotball har i 2025 hatt det sekstende året som eige idrettslag i allianse med Stord Idrettslag.

9. desember 2009 vart det i ekstraordinært årsmøte i Stord IL vedteke at Stord IL skal organiserast som eit allianseidrettslag. I skipingsmøte same dag vart Stord Fotball skipa som eige sær-idrettslag i allianse med Stord IL.

Det var registrert om lag 550 aktive medlemmer i 2025. I tillegg kjem trenarar, oppmenn og lagleiarar som samla utgjer om lag 160 engasjerte kvinner og menn.

Robin Øvrevik og Jon Andre Røyane har vore tilsett som spelarutviklarar med ansvar for gjennomføring av spelarutviklingstiltak, inkludert fotballskular og ferieklubbbar. Dei har også administrative oppgåver knytta til gjennomføring av cupar, og trenarrolle for aktivitetar knytt til talentutviklinga i både barne, ungdomsgruppa og a-laget.

Åge Aadland hadde i 2025 ein 25% stilling. Åge si hovudoppgåve har vore rekneskap.

Stord Fotball har og i 2025 fått god hjelp av Sverre Skjold Olsen og Emil Lone, som har bidratt til å få prosjekta til å gå rundt. I tillegg har mange ungdommar jobba på fotballskular, sommarklubb osv.

Vidare har Sverre Skjold Olsen blitt ansatt midlertidig som spelarutviklar gjennom økt aktivitet på tiltaka våre, samt for å dekke opp at Jon Andre Røyande tok ut farspermisjon på slutten av året.

Det har vore om lag 5 årsverk i organisasjonen i 2025, dette inkluderer stillingane nemnd ovanfor, samt innleigd arbeidskraft til diverse prosjekt, spelarar/trenarar med kontrakt, reingjering osv.

VISJON OG MÅLSETJING

Stord Fotball sin visjon er nedfelt i mottoet «Breidde og Topp».

Stord Fotball vil med denne visjonen visa at me vil leggja alt til rette for at kvar og ein som vil spela fotball hjå oss skal få eit tilbod der dei føler at dei meistrar aktiviteten. Det viktige for oss er at dei har det kjekt på trening og i kamp og i tillegg lærer og utviklar seg. Klubben skal sikra at dei opplever eit trygt miljø og at alle er inkludert i fotballfamilien vår. Me vil og leggja til rette med tilbod til dei som ynskjer å trena meir.

Trivsel og meistring er viktig i kvardagen til barn og unge, så det er fokus i klubben på å gi desse eit variert og utviklande tilbod på fotballbanen, og i tillegg ha fokus på det sosiale samhaldet i laga dei høyrer til. God helse og fysisk aktivitet er berekrafta i ein sunn konkurranse med jamaldrande.

Stord Fotball sine verdier er meistring, glede og samhald.

Meistring er viktig for å sikre at spelarar og støtteapparat jobbar med å forbetre seg sjølv og laget, både individuelt, som ei gruppe og som klubb.

Glede er viktig for å sikre at spelarane våre nyt prosessen med å spela fotball, for å halda motivasjonen høg, for å sjå fram til å møte opp og å sjå tilbake på ei kjekk tid i fotballen.

Samhald skal sikre at laget fungerer som ein heilskap, både på og utanfor banen, for å sikre at alle skal føla seg velkomne, og at ein kjenner på tryggleik i Stord Fotball.

Som Kvalitetsklubb jobbar Stord Fotball med fokus på at det er «Klubben som er sjef», det vil seia at det er organisasjonen og reglar/rammer i klubben som skal styra aktiviteten. Sportsleg utval i klubben har gjennom året 2025 hatt god kontakt med laga i klubben og har ansvar for at sportsplanen vert kjent i klubben og at alle laga følgjer retningslinjene som ligg der. Rekrutterings- & opplæringsansvarleg i klubben har organisert oppstart av nye lag og gjennom sesongen organisert kurs for trenarane våre, slik at me fylgjer krava me har som kvalitetsklubb. Dommaransvarleg har gjennomført sine samlingar og rekruttering av dommarar i sesongen 2025. Fokuset vårt på opplæring av både trenarar, dommarar og andre frivillige i klubben gir oss eit apparat som gir medlemmene våre eit enda betre tilbod, noko me syns er viktig.

Stord Fotball har i 2025 hatt ulike prosjekt som har gitt eit tilbod med høg kvalitet til både medlemmar i Stord Fotball og også til andre klubbar i regionen.

Stord Fotball har i 2025 følgd vår nedfelte strategi når det gjeld rekruttering til seniorlaga for menn og damer med fokus på ein balansert kombinasjon av eigenutvikling og tilføring av nye spelarar frå andre klubbar. Me har som mål at kvalitet og satsing på sportsleg utvikling vil gjere Stord Fotball til ein attraktiv arena og førsteval for motiverte og treningsviljuge fotballspelarar i regionen.

Nokre av sponsorane i 2025:







Stord Fotball vil rette ei stor takk til alle sponsorane som har støtta oss i 2025.

ANLEGG

I 2025 starta me arbeidet med å identifisere ulike områder innan anleggssida me ynskjer å ta tak i for å bygga klubben vidare inn i framtida. Det er viktig at me går fram på ein strukturert måte og at det er dedikerte personar som jobbar med denne sida av klubbdrifta. Dette er krevjande arbeid, men utvikling av ulike anleggstiltak er under utarbeiding.

Det første steget er å etablere ei mindre speleflate ved klubbhuset på Vikahaugane. Dette er det neste prosjektet me ynskjer å realisere og håper å ha det klart i løpet av 2026. Her har me allereie fått innvilga støtte på 300.000 kr frå vår gode hovedsponsor Sparebanken Norge. Resterande kostnader vil me dekke frå salget av Einar Iversen. Det synst me er ein god måte å nytte desse midlane på slik at det kommer mange born tilgode.

Jens Tore Engevik, med sin formelle kompetanse innan bygg og anlegg, som kom inn i styret i 2025 har gitt oss eit langt større trykk på anleggsutviklinga, og me ser fram til å sjå på ulike oppgraderingar og anleggsutviklingsprosjekter i 2026.

Baneanlegg

Dei «nye» kunstgrasbanane, som no begynner å bli nokon år, på Ås og Langeland gjer at både trening og kamplogistikken i barne- og ungdomsfotballen vert planlagt og gjennomført på ein meir oversiktleg og rasjonell måte enn tidlegare.

Kunstgrasbanen på Vikahaugane, som for nokon år sidan sto fram som eit moderne, komplett og brukarvenleg anlegg, er no begynt å bli i svært dårleg forfatning. Banen har i 2025 vore hovudarena for mange lag, samt at den vert brukt aktivt av skulane rundt Vikahaugane og spesielt Toppfotball linja ved Stord VGS idrettslinja. Kommunen har no reparert fleire store opne sår i banen og dette har gjort at aktiviteten har blitt utført utan frykt for at dommarar kunne stoppe kampar grunna dårleg dekke. Det ligg og inne politisk vedtak om at banen skal kunne rehabiliterast/bytte dekke i 2026. Grunnen til at det ikkje er gjort tidlegare er at banen er under 10 år gammal og det er då ikkje mogleg å få spelemidlar til dette. Langeland og Ås nærmar seg og eit punkt der fornying må vurderast.

Grasbanen på Vikahaugane var stort sett i bra forfatning i sesongen 2025, men mykje grunna at ein har vore heldig med været. På slutten av sesongen vart likevel banen så våt og dårleg at det var på kanten at me fekk spela dei siste heimekampane på Stord Stadion. Det var ein suksess å leggja på vekstduk på banen i mars 2025. Denne låg i 8 dagar og fekk fart på veksten og dermed strukturen i banen. Det er framleis von om at Stord kommune skal rehabilitere grasbanen.

DOMMARAR

Ungdom og voksen fotball: Fotballsesongen 2025 er historie. Aktiviteten var høg, og det viste også igjen på antall kamper å dømme. Ved utgangen av 2025 var me 10 aktive autoriserte dommarar i Stord Fotball – ein auke på 2 frå 2024. Inkludert i dei 10 er ein overgang frå Trott på tampen av året.

Rekrutteringsdommarkurs for 2026 sesongen er som før todelt – 1 e-læringsdel som må bestås, før 12 timer fordelt på to dager med fysisk oppmøte.

Fysisk kurs for Sunnhordland er planlagt på Bremnes 07-08.feb. Dommaransvarleg har eit håp om å få med 2-3 frå vår klubb. Det er viktig å få opp antalet då det er ein del av de rutinerte dommarane som har signalisert moglegheit for nedtrapping.

Stord-dommarane hadde til saman 252 kampar i ungdom og seniorfotballen i regi NFF Hordaland gjennom 2025 sesongen, noko som må seiast å vera veldig bra. I tillegg hadde me ca 45 treningskampar – dei aller fleste for lag tilhøyrande klubben, men òg andre lag i distriktet.

Dommargruppa har hatt 3 samlingar i 2025. Felles kick off møte med alle dommarane i sonen i mars, sonesamling i mai på Vikahaugane og Trotthuset i august. Me hadde eit håp om å få til enda betre samarbeid på tvers i sonen, men det har vist seg vanskeleg da det er en del utskiftingar/lite aktive dommaransvarlege i klubbane i Sunnhordland. Eit lyspunkt er Bremnes som har fått på plass ny frå oktober.

Det er ved utgangen av 2025 opp i mot 20 autoriserte dommarar tilknytt laga i Sone Sunnhordland (inkl Trio). Dette er ein nedgang på nokre få dommare ift i fjor. Det er pt ok dekning av dommere, spesielt i dei yngre årsklassane, men antallet må opp – bl.a er det signaler om enkelte som vil trappe ned og nokon er på flyttefot.

Ved vårsamlinga i regi kretsen var 2 av dommarane frå klubben deltakarar på Thon Hotel Kokstad, Dette er nyttige arena for fagleg og sosialt påfyll.

I Sunnhordland er det som sagt ved inngongen til 2026 bra belegg av dommare. Ein bør imidlertid oppmode både vaksne og ungdommar, som av ein eller anna grunn gir seg/trappar ned med fotball, til å ta rekrutteringsdommar-kurs som blir arrangert kvar vår i sonen.

Barnefotball : I vårsesongen var det G/J 14 som dømte kampene i barnefotballen – dei fortsatte med sine dommaroppgåver som starta hausten 2024. Dei gjorde ein meget god jobb og tilbakemeldingane er udelt positive.

Før haustsesongen 2025 og Puttefestivalen var G/J13 inne og tok Klubbdommarkurs. Dei har òg gjort ein strålende jobb gjennom hausten, og kjem til å fortsette vårsesongen 2025. Totalt var ca 25 klubbdommare i aksjon i 2025.

8 dommarar frå barnefotballen var på kurs for å kunne dømme 9'er fotball i 12 årsklassen før sesongen. Dette er ein god læringsarena for å rekruttere til vidare dømning i ungdomsklassen. Underteiknede har varsla at han fråtrer vervet som dommaransvarleg før 2026, men vil hjelpe til med å få ny dommaransvarleg skikkelig i gong gjennom 26-sesongen

Mvh

Per Martin Furevik - dommaransvarleg

KURS OG UTDANNING

I desember dekkja klubben opphald og Cupfinaleseminar på Ullevål stadion for 10stk trenarar/ frivillige som har vert med lenge i klubben. Vår nye samarbeidspartner DAT, sponsa flyreisa tur/ retur Stord – Oslo.

For klubben er det viktig å ta vare på og utvikle både kompetansen og samhaldet i trenar og lagleiar gruppene. Dette er noko me har satt fokus på og me ser at klubben er ein attraktiv arena for trenarar og dommarar å utvikle seg i.

AKER SOLUTIONS PUTTEFESTIVAL



Aker Solutions Puttefestival vart i 2025 arrangert for 36. gang med ca. 200 påmeldte lag. Det er 2. året på rad med ny påmeldingsrekord!

Atter ein gong vart Vikahaugane fylt med glade og forventningsfulle spelarar, trenarar, foreldre og andre interesserte. Tilbakemeldingane var svært gode; nok ein festival me kan vera stolte av!

Festivalleiar Robin Øvrevik og den kompetente arrangementskomiteen gjennomførte festivalen på ein framifrå måte saman med om lag 500 foreldre og ungdoms/seniorspelarar som stilte opp og gjorde ein fantastisk innsats. Dette er eit formidabelt lagarbeid!

Som i 2024 vart hoppeslott flytta inn i Nyehallen då det vart ein god erfaring frå året før. Samstundes vart det arrangert ulike andre aktivitetar i nærleiken av hoppeslotta, mellom anna ein særskild populær stasjon med ansiktsmåling. Det vart også rigga til med mange bord i Nyehallen, noko som fungerte bra og gav mange ein velfortent pause utpå dagen.

I 2025 var me svært heldige med veret og Aker Solutions Puttefestivalen vart ein god oppleving for store og små.

Tusen takk til det lokale næringslivet for dykkar støtte, tusen takk til alle som jobba dugnad og tusen takk til alle som var med å gjere dette til nok ei minnerik helg for unge fotballspelarar og deira nærmaste.

ØVRIGE ARRANGEMENT

Stord Fotball har i 2025 arrangert følgjande:

3v3 cup, inne, i januar og november.

Fotballskule i vinterferien, ei veke i februar.

Tine Fotballskule, ei veke i juni.

Sommarklubb, 3 veker i juni og juli.

Fotball- og aktivitetsskule, ei og ei halv veke i august.

Puttefestivalen i august.

Fotballskule i haustferien, ei veke.

Romjulscupen.

Fotballdag, 4 gonger, på planleggingsdagar.

SENIOR MENN



2025-sesongen vart ein god sesong for Stord Fotball. Innleiinga til sesongen var prega av ein del «uro», då fleire av dei rutinerte spelarane hadde valt å trappe ned. Trenarteamet som endeleg var på plass i slutten av januar var Robin Øvrevik, Kjell Petter Neset og keepertrenar John Andre Njåstad.

Laget opna oppkøyinga med mange nye spelarar. Treningsleiren til Spania i midten av februar vart ekstremt viktig for gruppa. Her fekk me jobba tett i lag og la grunnlaget for kulturen i gruppa. Det var på mange måtar eit generasjonsskifte for Stord Fotball, der rutinerte spelarar som Johannes Kyvik Skard og Roger Blokhus Ekeland var viktige spelarar med gode verdiar som løfta gruppa undervegs.

Totalt spelte 29 ulike spelarar A-lags kamp for Stord Fotball i 2025.
Eldstemann var også dette året Kristian Magnussen, 43 år.

Alt i alt ein god sesong for Stord Fotball, med mange unge spelarar som fekk debutere i 3. divisjon. Laget enda på 7. plass, med ein målforskjell på 58-54 og 42 poeng. Der toppscorar Roger Blokhus Ekeland skåra 34 av måla!

Prisar:

Årets spelar: Roger Blokhus Ekeland

Årets Toppskårar: Roger Blokhus Ekeland

Årets mest framgangsrike: Albert Sjo Hystad

Støtteapparat:

Oddvar Skard

Jan Aksnes

Ivar Andre Vedå

SENIOR DAMER



Laget fekk ein treg sesongstart grunna skadar og varierende treningsgrunnlag, men utviklinga steig i takt med betre oppmøte. Hovudmålet som var å halde plassen i 3. divisjon vart nådd utan større utfordringar.

Individuell utvikling er jobba med gjennom kvalitet i øvingar og konkrete tilbakemeldingar. Spelarar med skadar vart følgde tett opp og fekk tilpassa retur til trening. Lagmiljøet auka gradvis og blei sterkare gjennom sesongen.

Samarbeidet med støtteapparat og klubb fungerte fint. Treningar har vert planlagde og tilpassa, og VEO er blitt brukt aktivt til analyse og læring.

Spelarstallen har potensial til topp 3. divisjon, men ønske om forsterkingar – spesielt spelarar med høg treningsvilje, noko me ser finnes i distriktet.

Målet for neste sesong bør vere å etablere seg blant topp 5. Det er behov for eit styrka støtteapparat, med sosialgruppe, arrangementsgruppe, dugnadsgjeng og lagleiar. Klubben bør også satse på gode trenarar i yngre årsklassar og leggje til rette slik at trenaren kan fokusere på trenarrolla.

Prisar:

Årets spelar: Tuva Kismul Østvold

Årets Toppskårar: Amanda Almås

Årets mest framgangsrike: Amanda Almås

Trenar og støtteapparat:

Øyvind Mellestrand

Jonas Jonsson

Atle Ersland

Anders Ekse

BARNE- og UNGDOMSFOTBALLEN

2025 er eit nytt år kor me opplever godt driv og utvikling i barnefotballen. Mange born i våre to skulekrinsar (Leirvik og Langeland) ynskjer å spele fotball, og me opplever eit fint engasjement for arbeidet hjå mange. Å sikre gode rammer for borna med gode og trygge vaksne rundt, er eit prioritert arbeid for oss. Ein god oppstart med presentasjon av rammene for trenar- og lagleiarvervet; sportsplan og klubbhandbok, tilbod om kurs og jamn rettleiing, er område me ynskjer å byggja vidare på og styrka. Det veit me er førebyggjande. Det å «kopla» laga frå dei ulike skulekrinsane saman er òg ønskjeleg. Erfaringsmessig er verdien av å få til samkøying tidleg til det beste.

I 2025 har utvalet arbeidet vidare med AlleMe-prosjektet. Det er no inne i sitt femte år Me opplever at prosjektet byrjar å finna ein form som er handterleg.

Verdt å merka seg er at Stord fotball starta samarbeid med Brann og var med å starta Kniksen Sunnhordland i lag med fleire andre naboklubbar. Kniksen Sunnhordland har i dag om lag 170 medlemmar. I tillegg får me vidareutvikla lokale trenarar frå Stord Fotball, som Sverre, Thomas, Gøran og Victoria. Treningar kvar Laurdag og Søndag gjennom heile året med unntak av sommarferie og juleferie.

I utvalet 2025:

Svein Ove Eikenes

Trond Eirik Samdal Nielsen

Lars Peder Langeland

Kjell Robert Stokka

Lars Peder Langeland

Espen Kyvik

JENTER 13



Jenter 13 år (J2012) blei fra året 2025 slått saman med Solid J13, og med 9 spelarar frå klar klubb var det eit perfekt utgangspunkt for samarbeid. Jentene hadde trent saman ei stund før samanslåing, og kjente kvarandre litt frå før av.

Jentene har stortrivst i lag frå første stund, og trenarar og lagleiarar har nytt godt av å bli ei større leiargruppe for laget. Jentene har spelt i Storddraktar på Vikahaugane, og i Soliddraktar i Hustredalen.

2025 har vore eit innhaldsrikt og spanande år for laget. Jentene spela i Rogalandsserien i 2. divisjon, og gjorde ein god innsats våren 2025, med nokre seirar og nokre tap.

I tillegg hadde me sosiale samlingar, med bl.a. klatring i Nysæterhallen og felleskvelds etter trening. I tillegg hadde me dugnadar i form av luking av bed, pantedugnad og plastdunad i Leirviksområdet.

Det er ein sosial gjeng, og me har hatt mange kjekke stunder saman. Fleire av jentene meldte seg òg på dommarkurs i regi av Solid før Kiwi Bama cup våren 2025, og fleire av jentene har fortsatt som dommarar i ettertid, både på Puttefestivalen og som dommar på seriekampar hausten 2025.

I juni reiste me til Sør Cup i Kristiansand/Vennesla. Laget klarte seg kjempegodt, og enda til slutt i finalen i B-sluttspillet mot Djerv1919. Finalen blei spelt i strålende sol i Kristiansand sentrum, og med 1-1 som sluttresultat etter ordinær speletid blei det straffesparkkonkurranse. Djerv1919 gjekk seirande ut av denne. Det blei likevel ein kjempefin og lærerik opplevelse for jentene.

Hausten 2025 opplevde laget stor utvikling og spelarglede, både individuelt og som lag. Jentene var òg med i Haugesund Sparebank Cup i slutten av oktober, og spela godt mot fleire gode lag i regionen. Me har opplevd godt oppmøte på trening, og me har opplevd lite fråfall.

Jentene enda til slutt opp med å vinne serien i 2025, og siste kamp før jul hadde Jens Rune Kyvik stelt i stand både musikk, røyk og lysshow før kampstart på Vikahaugane. Stor stas!

Me vil takke alle spelarar for innsatsen, samt trenarar og foreldre for alt engasjementet i 2025. No gler me oss til eit nytt spanande år, med 11-fotball.

Trenarar: Espen Kyvik, Katrine Borgenvik, Stig Ørjan Heimro

Lagleiarar: Lovise Heimro, Per Ove Alvsvåg og Gunhild Moss

JENTER 16



I 2025 sesongen har j2009 vært en gruppe med ca 23 fra Leirvik, Langeland og noen fra Fitjar.

Vi Kick startet sesongen med en overnatting hos Avalsnes, vi fikk leie hallen deres.
Laget har hatt 3-4 treninger i uken. Noen av jentene har fått hospitert opp til damelaget.

Cuper vi var med på:

Lerøy jente cup, her fikk vi oss en fin 4. plass.

Vidar Cup, denne cupen klatret vi til 2. plass

Dana cup.

Reggie cup, her og endte vi på en sterk 2. plass.

I serien spilte vi i 2. Div i Hordaland. Her vant vi.

Trener: Svein Ove Eikenes, Lars Peder Langeland, Asle Skulstad og Espen Lone.

Fra høsten fikk vi inn Dagfinn Hillestad i trener teamet.

Lagleder: Line Erichsen.

GUTAR 13



Sesongen 2025 har vore eit år prega av fullt samarbeid med Solid. Samarbeidet vart etablert i januar, med fire treningsøkter per veke fordelt mellom Solidbanen og Langeland.

Gjennom sesongen har troppen bestått av om lag 50 spelarar. Oppmøtet på treningane har i hovudsak lege på 30–35 spelarar, med noko lågare oppmøte på søndagstreningane.

Til vårsesongen meldte vi på tre lag: eitt lag i 1. divisjon, eitt i 2. divisjon og eitt i 3. divisjon. Med ein stor spelarstall viste det seg utfordrande å gje alle eit tilfredsstillande kamptilbod i vårsesongen. I forkant av haustsesongen valde vi difor å melde på eit fjerde lag i 3. divisjon. Dette sikra alle spelarane god kampaktivitet utover hausten.

Vi har gjennom sesongen sett ei tydeleg positiv utvikling både i ferdigheitsnivået hos spelarane og i det kollektive spelet. Lag som opplevde tap i vårsesongen, klarte i fleire tilfelle å snu dette til sigrar i haustsesongen. Det har vore lagt stor vekt på ballbesittande øvingar i varierende banestorleikar, både med og utan keeper, noko vi har sett har gjeve gode utslag i kampsituasjonar.

I tillegg til deltaking i Adidas Cup og Olaussen Cup for førstelaget, samt Vintercup for både første- og andrelaget, vart Sør-Cup det definitive høgdepunktet for spelarane. Til Kristiansand reiste vi med to jamnbyrdige nierlag på nivå éin og to jamnbyrdige sjuerlag på nivå to. Spelarane fekk kjenne på tøff motstand, men opplevde mange jamne kampar og ei minnerik turnering med sterkt sosialt fokus.

Trenarar

Stord:

Martin Grindstad, Javier Ignacio Moyano, Magnar Haaland Olsen, Tor Magne Prestøy Lie, Remy Smolka, Kjetil Østrem

Solid:

Andre Valvatne, Bjørn Jørgensen

GUTAR 14



2025 har vore eit innhaldsrikt år for Stord G14 (G2011).

Me starta med ei stor spelargruppe etter samanslåing av Solid og Stord på dette årstrinnet. Nytt for sesongen var ny hovudtrenar Thomas Steensohn, ilag med Kjell Robert Stokka som var ny trenar inn.

Trenargruppa endra seg og Magnus Grov slutta som trenar, og det same har Kåre Olav Skram gjort. Totalt har det vore 4 trenarar som har fulgt gutane, Thomas, Kjell Robert, Gøran og Halvor. Det har vore ein jamn og god trenardekning på alle treningar. I tillegg til lagleiar Julie.

Treningar: Det er utført spelarundersøkingar for å kartlegge kor mange treningar gutane ynskjer å delta på, og om dei ynskjer å spele på 1.el 2.laget.

Det har vore totalt 4 treningsøktar a 1,5 t som har vore tilbodet for dei ivrigaste.

Me har delteke i fleire cupar gjennom året, noko som har gitt oss verdifull kamptrening og gode opplevingar saman:

- Vinterserien – nokre gode kampar og matching, men det vart vanskar med værforhold og vanskar med gjennomføring av kampar, og me enda med å trekke oss frå turneringa.
- Adidas cup – god matching mot sterke lag.
- Dana Cup – 2 lag påmeldt og ei stor gruppe som reiste. Alle trenarar og lagleiar deltok.
- Olaussen Elite Cup (hausten) – Ei krevjande turnering med høgt nivå, der me fekk mykje læring og erfaring.
- Regy Cup (hausten) – var diverre fullbooka, og me fekk ikkje plass.

GUTAR 15



Stord G2010 har i år og vore ei stor gruppe bestående av Stord, Trott og Solid spelarar. Dei har vore ei flott gruppe med motiverte og ivrige fotballspelarar. Me har hatt nivådeling og hatt 3 lag påmeldt i serien. Lag 1 har vore i 2. divisjon i G16 serien i Hordaland mens lag 2 og 3 har vore i 2. og 3. divisjon i G15 serien i Rogaland.

Gruppa har hatt inntil 4 treningar i veka og gutane har valt sjølv kor mange dei har vore med på, men minimum 2 og mange har vore på 4 treningar kvar veke, og gjerne ein kamp oppå der igjen. Det har vore mykje kampar og logistikk med ei gruppe på over 50 spelarar, men det har vore mykje god fotballutvikling og nye vennskap er bygd. Nokre har og fått hospitert opp og spelt kampar med årsskullet over.

Gutane (og foreldra) har vore gode på dugnad og me fekk ein flott sommarcup til Danmark og Danacup. Heile gjengen vart innkvarter i same gymsal, so det blei ei noko tett affære, men gutane hadde det kjempekjekt saman.

Gutane deltok med tre lag i Haugesund Sparebank Cup i haust, der me enda med eit lag i både A og B finalen. Begge lag fekk med heim pokal, men det blei knepne tap på begge. Ein kanoninnsats frå gutane som no ikkje var delt i nivå, men blanda på tvers av nivå. Ein kjempekjekk cup for alle, sjølv om ein måtte ha vekkarklokka på tidleg den helga.

Hautsesongen vart den siste for denne gjengen samla då samarbeidet med dei andre klubbane vart avslutta. Gjengen slutta av i lag med eit kjekt sosialt lag på Nordbygda ungdomsskule med pizza, landslagskamp og god stemning. Ein flotte gjeng å jobbe med og gutane syns alle at det var tungt å skulle bryte opp gruppa.

G2010 Stord-gjengen starta i vinter med bli kjent kveld og nokre treningar saman med G2011 før ei velfortent julaferie.

Støtteapparatet har vore stort og på det meste opp mot 20 trenarar og lagleiarar.

GUTAR 16



Leif Didrik «Dikki» Steensohn var hovudtrenar også denne sesongen.

Laget består av 15-16 svært treningsvillige gutar, og me har også nytta oss av nokre G15 gutar i kampar i løpet av sesongen.

Starta sesongen med deltaking i vinterserien i Bergen, der da blei seier i finalen. Seriespel blei det for andre året i Bergen sin 1.div, der det blei 2.plass på våren og KM-serien hausen 2025. Blei mange unødvendige tap i løpet av hausten, så kampen om KM gjekk utan Stord. Det blei også i 2025 deltaking i Adidascup, og det blei seier 1-5 i 1/16 dels mot Åsane i da som blei årets beste kamp for G16. Det blei tap i 1/8 mot Løvenstad på Åmot stadion.

Sommarcup blei det i Danmark og Danacup. Leif Didrik Steensohn reiste saman med dei fleste gutane over til Danmark, og Dikki og gutane budde på fellesrom med G14. Cupeventyret slutta i andre runde mot eit solid Brodd som til slutt vant cupen.

Hovudtrenar: Leif Didrik «Dikki» Steensohn

Assistenttrenar: Tore Johannessen

Lagleiarar: Olav Sævareid, Roger Sortland & Linda Laukhamar

JUNIOR 1&2



Året 2025 vart eit år med både utfordringar og positive erfaringar for G19-1. Sesongen starta med ny hovudtreinar i Jon Andre Røyrane, samstundes som laget gjekk inn i ein generasjonsovergang med eit stort avgangskull frå 2006, få spelarar fødte i 2007 og eit stort innslag av 2008-spelarar. Dette førte til eit svært ungt juniorlag.

Treningsviljen i spelargruppa har vore svært god gjennom heile året. Laget har gjennomført 3–4 treningsøkter per veke, med eit gjennomsnittleg oppmøte på 15–20 spelarar per økt.

Tidleg i sesongen var målsetjinga å delta i G19 2. divisjon Hordaland. Laget vart likevel plassert i G19 2. divisjon Rogaland. Bakgrunnen for ønsket om 2. divisjon var å unngå ein reprise av føregåande sesong, der laget fekk store utfordringar i 1. divisjon.

Seriespelet i 2. divisjon vart gjennomført på ein svært god måte, og laget vann avdelinga relativt komfortabelt. Sesongen enda med sju singlar og eitt tap.

Jr2 spela i 3.divisjon Rogaland og hadde ein positiv sesong med gode resultat og kjekke kampar.

I sommarferien deltok laget i Norway Cup, noko som vart ei svært positiv oppleving for både spelarar og støtteapparat. I gruppespelet vart det éin siger, éin uavgjort og eitt tap, noko som på små marginar førte laget vidare til B-sluttspillet. Etter å ha lagt skuffinga bak seg leverte spelarane ein sterk turnering og tok seg heilt til semifinalen i B-sluttspillet.

Etter vår- og sommarsesongen vart det tydeleg at laget hadde behov for eit meir utfordrande sportsleg tilbod for å sikre vidare utvikling for spelarane. Laget meldte seg difor på i G19 1. divisjon Bergen for haustsesongen. Her møtte laget svært sterke motstandarar med høgt individuelt og kollektivt nivå, noko som resulterte i ein krevjande haust.

Fasit etter ferdigspelt serie vart tre uavgjorde kampar og fem tap. Fleire av dei uavgjorde kampene kunne med betre utteljing ha vorte til singlar, og resultatbiletet kunne dermed sett annleis ut. Samstundes viste laget i periodar at dei er i stand til å konkurrere med dei beste, men òg at laget framleis er ungt og har mykje å utvikle.

Trass i ein resultatmessig tung haust har spelargruppa vist svært god haldning, høg motivasjon og sterk treningsvilje. Oppmøtet på treningar og kampar har vore gjennomgåande godt.

Trenarar:

Sander Stokka, Jon Andre Røyane

Oppmenn:

Kristian Matre, Maren Lien

Styret vil takke administrasjonen og dei tilsette, trenarar, lagleiarar som brukar fritida si på å gje born og unge eit godt tilbod i klubben, og til slutt takk til alle sponsorar og støttespelarar som har vore med å bidratt i 2025.

Me kan snart byrje å sjå fram til ein ny spanande fotballsesong for alle laga i løpet av 2026.

Stord 26.02.2026

Frode Gravdal Olsen
Styreleiar

Christian Myklebust
Styremedlem

Gunnhild Hauge
Styremedlem

Johannes Eldøy
Nestleiar

Gøran Odland
Styremedlem

Anne Margrethe Madtsen
Styremedlem

Jens Tore Engevik
Styremedlem

Securely signed with Brevio

This document is electronically signed and sealed with Brevio under **eIDAS**, valid in all EU states. Signatures comply with **eIDAS** and **PAdES** standards.

The identities of the signers are listed below: